

Regional News Unit AIR Aizawl  
Saturday, June 01, 2024

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

- Lok Sabha inthlanpuia vote tlate June ni 4-a chhiar tura inbuatsaihna chu tluang taka kalpuiin Mizoram chu vote chhiar turin a inpeih fel tawh.
- Union Home Minister, Amit Shah-a'n nimin tlai khan Chief Minister Pu Lalduhoma phone-a biain tun hnaia Mizoramin Cyclone Remal vanga chhiatna a tawh te a tuarpui thu leh a tulna apianga puih a inhuam reng thu a hrilh.
- Lok Sabha inthlan thawsarihna leh a tawpna ber turin tukin dar 7 atang khan vote thlak a ni.
- Prime Minister Narendra Modia chuan hmarchhaka Cyclone Remal-in chhiatna a thlen chu pawl a tih thu a sawi.

<><><>

### LS VOTE COUNTING

Lok Sabha inthlanpuia vote tlate June ni 4-a chhiar tura inbuatsaihna chu tluang taka kalpuiin Mizoram chu vote chhiar turin a inpeih fel tawh.

Election Commission of India thupek angin vote chhiarna hmun tura ruahman Counting Hall-te chu vote chhiar hma ni 3-ah buatsaih fel vek tur a nih angin heng te hi District hrang hrangah peih fel vek a ni tawh a. Vote chhiar tura mawhphurhna hrang hrang neite'n training an zo fel tawh a. Vote chhiarnaah hian Returning Officer, Assistant Returning Officer, Counting Supervisor, Counting Assistant, Micro-Observer leh hna pawimawh dang hrang hrang thawktu mi 2000 vel an awm dawn a. Security mi leh sa ten Counting Centre tinah thuah thumin venhim hna an thawk dawn a ni.

Chief Electoral Officer, Madhup Vyas-a chuan Mizoram pumah vote chhiarna hmun (Counting Centre) 13 awm tura ruahman a ni a, Aizawl District-ah Counting Centre 3 a awm ang a, District dang zawngah Counting Centre 1 theuh a awm ang, a ti. Counting Hall 40 a awm dawn a, heng Counting Hall-ah hian Counting Table 379 awmin vote chhiarna dawhkan tinah hian Counting Supervisor pakhat, Counting Assistant pakhat leh Micro-Observer pakhat zel an awm dawn a, vote chhiarna hmun hi ECI ruat Observer ten an vil dawn a tih a sawi a ni.

Counting Table awm zat leh vote chhiar tur, Counting Station awm zat hian vote chhiar hun pawh hi a hrilh dawn a. Thawh 5-a chhiar zawh tur Assembly Segment 5 a awm a, thawh 4-a chhiar zawh tur awmna Assembly Segment 15 a awm a, thawh 3 awmna Assembly Segment 18 awmin thawh 2-a chhiar zawh tur Assembly Segment 2 a awm a ni.

June ni 4 zing dar 8 atangin vote chhiar tan a ni ang a, Aizawlah chuan Postal Ballot chhiara bul tan a ni dawn a. Postal Ballot chhiar tan a nih atanga minute 30 hnuah EVM (Control Unit)-a vote tlate chhiar zui nghal a ni ang. Vote chhiar lai hi Candidate, Election Agent leh Counting Agent-te'n a hmunah an en thei dawn a ni.

<><><>

MSU

Education Minister Dr. Vanlalhlana'n zirlaite chuan nih tum nei rana lehkha an zir a ngai, a ti.

Aizawl Chanmari YMA Hall-a HSSLC Examination 2024-a Mizo Zirlai Top 3-a tlingte lawmpuina Mizo Students' Union-in an buatsaihah he thu hi sawiin Dr. Vanlalhlana chuan zirlaite chuan tun atangin an nih duh an lo ngaihtuah lâwk a ngai a; pawl 12 an pass atanga college an zawh hunah an thil tih tura an chian a ngai a, ngaihtuahna an sen a tul, a ti a. An kalna a lo fuh loh pawhin thlak mai chu thil tlai a ni lo va; tunlaih chuan thiam bik neih a pawimawh a, chumi tur chuan ngaihtuah bik leh thiam bik thil nei turin zirlai kalkhawmte a fuih a. Zirlaite chu hna zawng tur ni lo, mahni kea ding tura a duh thu leh intodelhna lamtuang zawh tura lehkha zir turin a duh tih a sawi.

He hunah hian MSU President Pu Samuel Zoramthanpuia pawhin thu sawiin, Mizorama hnam dang chengte chu Mizorama pianga sei lian an nih vang ngawtin Mizo an ni lova, ILP an neih ngei ngei a ngai a ni, a ti a. MSU chuan ILP nei lote um chhuah hna an la kalpui tur thu a sawi bawk.

He hun hi ZIDCO Chairma Pu JK Dawngzuala leh Mizoram Co-Operative Apex Bank Limited Chairman Pu Lalnunsanga te pawhin an hmanpui a; HSSLC Mizo Zirlai Top 3 lawmpuina hunah hian zirlai 9 te chawimawi an ni.

<><><>

BODY FOUND

Nimin chawhma dar 10:30 vela Hortoki bul Tlawng kaia hmeichhe ruang 1 chhar chu Aibawka leiminin a hnawl Pi Vanlalruali kum 34, Pu Mathew Lalchhanhima nupui a ni tih finfiah a ni.

Pi Vanlalruali ruang ngei a ni tih hi a pianpui unaute'n an fiah hnuah thil tihfel ngaite tihfel a nih hnuah an khua panpui a ni a. A pasal Pu Mathew Lalchhanhima hi leiminin a hnawl tel ve ngeia ngaih ni mah se a ruang hmuh a la ni ve lo.

Hetihlai hian Melthum leh Aibawka nimina ruang zawn hna thawkte'n ruang an hmuh belh lova, la hmuh loh zat hi 6 ni a, Mizo dan angin ruangte hi hmuh kim an nih hma chuan ni 7 chhung zawn chhunzawm a ni ang.

Hriat theih chinah he vanduinah thlenga thi zat hi mi 29 an ni a. Raung la hmuh loh hi Melthumah 4 leh Aibawkah mi 2 an ni.

<><><>

HLIMEN EVACUATION ORDER

Aizawl District Disaster Management Authority Chairman Aizawl DC, Nazuk Kumar-i'n Hlimen leh a chhehvel leimin hlauhawmnaa cheng zawng zawng te an chenna hmun chhuahsana hmun him lama insawn tura thupek a chhuah chu tlemin a tidanglam.

Aizawl DC hian Mizoram State Emergency Operation Centre leh Directorate of Geology & Mining te'n Hlimen leh a chhehvel leilung hi a ngheh loh hle avangin ruahtui tam zawk a tlak chuan chhiatna nasa tak a thleng thei ni-a an sawi bawhzuiin nimin khan Hlimen khua, leimin hlauhthawnawma awmte chu hmun him zawk pana an In chhuahsan turin thu a pe a. He thupek hi nimin tlai lam la la khan tidanglam lehin, Hlimen khaw chhunga chhiatna thlenna bul hnaia In pathum chhak lam chu a tawlh filh thlak rul tawh avang leh ruah a sur zel chuan a hlauhawm theih dawn avangin heng in pathum te hi chhuahsan tur a ni, a ti.

Vawiin hian leilung lam zir mi leh sorkar thuneitutte'n a hmun hi an en chiang dawn a; he lai hmuna chengte himna tura ruiahmanna leh hmalak zel dan tur chu inhriattir leh a ni ang

Hlimen khawtlang hruaitute hnen atanga thu dawn danin, Hlimena hmun him lo nia an ngaih chu Kapdaia Section a ni a, hei hi quarry chim piah lama awm a ni a. Helaia cheng te hi chhungkaw 78 vel niin chhungkaw tam tak chu hmun him lam panin an riak chhuak tawh a, nimin khan sorkar hotute nen sawn chhuahna lai tur te hi an enho a ni.

<><><>

## UNION HM

Union Home Minister, Amit Shah-a'n nimin tlai khan Chief Minister Pu Lalduhoma phone-a biaian tun hnaia Mizoram Cyclone Remal vanga chhiatna a tawh te a tuarpui thu leh a tulna apianga puih a inhuam reng thu a hrilh.

Home Minister hian Mizoram a mamawh chuan Team of Expert an rawn tirh theih thu Chief Minister hi hrilhin chhiatna an tawh dan report kimchang a rang lama theh lut turin a chah a, a tul angin an tanpui dawn tih a sawi a ni.

Pu Lalduhoma hian Union Home Minister hi lawmthu lo hrilhin, tunah hian chhiatna chanchin kimchang report puahchah mek a ni a, karleh lamah chuan Central lama an theh luh theih a beisei tih a lo hrilh a ni.

<><><>

## ASF

Tun thla chhungin Mizoramah Vawk pul hri (African Swine Fever ( ASF) vanga vawk thi zat chu 850 a ni a, vawk suat zat chu 1764 a ni, AH&Vety Dept Deputy Director Dr M. Zohmingthangi chuan a ti.

He thu hi Akashvani Corr-in a kawmnaah sawiin Dr M. Zohmingthangi chuan tun dinhmunah ASF chu Mizoramah a hri len nasat hunlai a nih chhoh mek a ni, a ti a. June leh July thla pheih hi chuan tun aia nasa zuala a hri a len nasat a rin thu a sawi a. Tun dinhmunah ASF avanga zangnadawmna dawng turte tan chhawmdawlina pek chhuah a la ni lo a ni a ti bawk.

Kumin January atanga tun thla thleng khan ASF vanga vawk thi zat chu 1186 a ni a, vawk suat tawh zat chu 1876 a ni. Heng vawk thi te hi Tuikual North ah 1 , Muallungthu ah 1 , Thingsul Tlangnuamah 11, Zemabawkah 6, Thingsulthliahah 9, Kolasib Mualvumah 3, Kawnpuiaah 2 a ni a.

ASF vanga vawk thi zat kum 2021-22 khan vawk thi zat chu 33417 a ni a, kum 2022-23 khan 12795 niin kum 2023-24 chhungin vawk 1139 niin tihian a vaiin ASF vanga vawk thi zat chu 47351 a ni tawh a.

Vawk thu avanga tanpuina dawng chungkua 2488 an awm tawh . AH& Vert Dept chuan ASF canga vawk chante tanpuina tur cheng nuai 311.66 a dil mek bawk a ni.

<><><>

#### LOK SABHA

Lok Sabha inthlan thawsarihna leh a tawpna ber turin tukin dar 7 atang khan vote thlak a ni a. Inthlan thawsarihna hi Parliament Constituency 57 ah neih a ni a. State leh Union Territory pasarihah huamchungah niin Uttar Pradesh leh Punjab ah seat 13 ve ve, West Bengal ah seat 9, Bihar ah seat 8, Odisha ah seat 6, Himachal Pradesh ah 4, Jharkhand ah 3 leh Chandigarh ah pakhat a ni a. Cndidate 904 an awm dawn a ni.

Inthlan thawsarihnaah hian candidate langsar tak tak an awm a. An zingah hian Prime Minister leh senior BJP leader Narendra Modi, Union Minister leh BJP leader Anurag Thakur bakah Congress leader Vikramaditya Singh leh TMC leader Abhishek Banerjee te an tel a ni.

Inthlan thawsarihna rual hian Odisha-a Assembly bial 42 ah vote thlak a ni bawk.

<><><>

#### PM

Prime Minister Narendra Modia chuan hmarchhaka Cyclone Remal-in chhiatna a thlen chu pawl a tih thu a sawi. Pu Modi-a chuan Assam, Meghalaya, Mizoram, Tripura leh West Bengal-a Cyclone Remal-in chhiatna a thlen hrang hrangte a ngaihven reng thu a sawi a. Chhiatna tuar zawng zawngte a tawrhpu thu leh a tawngtaisak thu a sawi a. Cyclone Remal-in chhiatna a thlen dante a enfiah thu leh sawrkar laipui atangin tanpuina awmte pek zel a ni ang a ti.

<><><>